



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 3

April ita nungi tayimtsü ishiba senzüdaktsütsü Vietnam renemer

'Ozü kia maktetra makang': Mamata Banerjee



VOL. XXIII ISSUE NO. 153 (ADOK 153) DIMAPUR SANGTENNÜ (TUESDAY) METSÜREMI (MARCH) 17, 2026 ₹ 5.00

ANGPTA-i 'No work, no pay' tetuyuba anema ola adoker

Dimapur, March 16, 2026 (TYO): Directorate of School Education-i "No work, no pay" policy tenzükba atema tebilemstü abener ta All Nagaland Government Primary Teachers' Association (ANGPTA)-i metetdaksüogo.

Department-i digital attendance records nung dang ajemdaker itasen katizükba ya tim masü ta ANGPTA-i ashi.

Directorate of School Education-i iba policy ya February 1, 2026 nungi tenzüksü ta ashiba ajanga Nagaland nung tesayurtemi tebilemstü tulu abener ta ANGPTA-i School Education nung Principal Director dangi

shidi ka zülüogo.

Iba tetuyuba ya attendance indang physical verification jungjunga mereprangi agütsü ama ajiteter, kechiyong digital data nung dang ajemdakba nung tashishitsü keta lir ta ANGPTA-isa ashi.

Iba tetuyuba nung itasen katizüka mayudang field verification mesüra inquiry asütsü kecha shia mali aser iba atema tesayurtem kanga shisabulur ta parnokisa metetdaksüogo.

Tesayurtem dak kongshiba tebilemstü aika mebentet yutsür itasen katitsü indang mapa ang aritepa inyakba nung tasüngdangba adoker ta ANGPTA-isa ashi.

Assam nung Mar 23 tashi nominations asütsü; April 7 nü nüboyimba tembangtsü

Guwahati, March 16, 2026 (Agencies): Assam Assembly elections agitsü osang sangdongba sülen Chief Electoral Officer Anurag Goel-i nomination maparen aser electoral maparen indang metetdaksüogo.

Candidate temi Hombar, March 16 nungi March 23 tashi anepdang 11:00 ako nungi nikongdang 3:00 ako tashi nomination papers agütsüsü akok ta Janata Bhawan nung Assam CEO Goel-i ashi.

"District Commissioner office ajak nung nominations agizüksü" ta paisa ashi.

March 24 nü nomination papers reprangtsü aser March 26 tashi nung nominations meyipa agitsü akok ta paisa shisem.

Iba maparen tembangba sülen ballot papers finalized asütsü aser electronic voting machines (EVMs) ballot units nung amshitsü atema government presses nung print asütsü.

"March 27 nikongdang 3:00 ako nung armed forces personnel atema electronically transmitted postal ballots yoktsü" ta Goel-isa metetdaksü.

Assam assembly elections atema nüboyimba maparenji April 7 nikongdang 5:00 ako tashi melatsü ta paisa ashi.

April 9 anepdang 7:00 ako nungi nikongdang 5:00 ako tashi polling asütsü aser polling metembangdang ghonda 48 jelia nüboyim anentsüla ta CEO Goel-isa metetdaksüogo.

Repolling asütsüsa kümra Election Commission of India-i tensa apir telemtetba agitsü ta paisa shisem.

February 10 nü electoral roll

sayadang vote enoktsür 2,49,58,239 liasü. March 15 tashi electoral roll update süa aruba sülen nisung 2,50,21,413 kümogo. Iba mapang vote enoktsür 64,000 shi bendenlokogo aser ajak senteper 1,64,000 bendenlok. Kasa mapang electoral roll nungi vote enoktsür lakh 1 shi agienogo ta Goel-isa metetdaksü.

Kerala aser Union Territory of Puducherry den külemi Assam nunga April 9, 2026 nü polling asütsü.

Deobarnü elections agitsü osang sangoktsüba sülen Assam ajungalen Model Code of Conduct (MCC) tenzükogo.

Election Commission of India (ECI)-i Hombarnü Assam nung Senior Superintendents of Police (SSPs) pungu mapa lemezüksüba osang metetdaksüogo.

ECI-i Chief Secretary dangi shidi züluba nung SSP tem tangsa mapai yoktsüla aser March 17 tashi nung parnoki mapa inyaktsü tenzükba compliance report agütsüsüla ta tetuyuba agütsüogo.

Commission-isa mapa nungi belenba ketdangsürtem nem election matem tashi election dak sendakba maparen kecha melemzüksütsü tetuyuba agütsüogo.

ECI-isa Assam assembly election atema retired IAS officer Manjeet Singh-i Special Observer inyaktsü shimogo.

Special Observer-i Assam nung Chief Electoral Officer den amalitepa election mapang logistical aser administrative support agütsütsü.

NSF-i Kohima nung 'Vande Mataram' anema lungkak aitogo



Kohima, March 16, 2026 (TYO): Ministry of Home Affairs-i January 28 nü Naga lima nunga National Song Vande Mataram atentsü tetuyuba agütsüba magizüker ta sayua Naga Students' Federation (NSF)-i Hombarnü Kohima nung lokti sentong tulu ka ayongzükba agiogo.

NSF-i ayongba sentong nung kaketshir aser nübor meyrjang aikati shilem agiogo aser parnoki "MHA's Jan 28 directive is an assault to secularism," "Naga rights are non-negotiable," "Stop forced policies," "The directive is a direct attack on our faith" tezülubatam amer lungkak ait aser Kohima jila nungi Lok Bhavan tashi ao.

Lungkak aitertemi Nagaland Governor ajanga India Tir Droupadi Murmu dangi shidi ka züluba agütsüogo.

Official sentongtem nung aser shisaliok rejutem nung Vande Mataram atentsü tetuyuba magizüker ya NSF-i züluba memorandum nung shia lir.

Naga nungeri linük tamaitstem aser ajak indang sobaliba inyaktsü agütsütsüba, ajisüka tamangba

yimsü dak sendakba inyaktsü tashiyim agi benshitsü tuyuba ya freedom of conscience alema lir ta NSF-i ashi.

Vande Mataram yanglushiba nung tsüngrem ka külemba indang dena lir aser ibaji Naga nunger tamangba aser sobaliba den meputep lir ta parnokisa India Tir Murmu dangi züluba shidi nung shia lir.

Shisaliok rejutem ya tangazükdak dang asütsüla. Shisaliok rejutem ya pei bilemnüba bilemstü aser democratic tangatetba alidak asütsüla aser tashiyim agi maparen meinyakdaksütsüla ta NSF-isa ashi.

Universal Declaration of Human Rights aser International Covenant on Civil and Political Rights amala international legal frameworks nung lateta aliba ama freedom of thought, conscience aser religion alitsüla ta parnokisa metetdaksü.

United Nations Declaration on the Rights of Indigenous Peoples-ia lisopur kintemi pei pei sobaliba rejutem ayutsü aser inyaktsü benshitsü temeten agütsü lir ta NSF-isa ashi.

Iba rally ya Naga nunger

maitsü aser tangatetba madak ketdangsübaren ajanga tetuyuba agütsütsü makok ta ashitsü atema ayongzükba agir ta NSF president Mteisuding Heraang-i ashi.

Iba sentong ya linük mesüra kin ka anema masü saka nübor mulungsentsü den meputep tetuyubatem agütsüba inyaktsü anema lir ta paisa ashi.

Iba sentong nung Naga Peoples' Movement for Human Rights (NPMHR), Nagaland Joint Christian Forum (NJCF), Nagaland Christian Revival Churches aser Catholic Association of Nagaland nungi tanishirtemia o jembu. Parnok ajaki sentong pusema nungitba aser Naga nunger sobaliba aser tamangba yimsü kümzükba ayutsü indang jembu.

Anungji Naga lima nung official sentongtem aser shisaliok rejutem nung Vande Mataram atentsü mesüra atemtsü tetuyuba ya meyipa agientsü ayongzükba ta NSF-i India Tir Murmu dang ayongzükogo.

Tarutsü nung ibala mesükba policy tem mapa küma meinyakdak tamasa Naga nunger den asüngdangyatsüla ta parnokisa ashi.

Nagaland nungi osangbenertem Bihar semdang

Dimapur, March 16, 2026 (TYO): Press Information Bureau, Kohima (Ministry of Information & Broadcasting, Government of India)-i achayanga Nagaland nungi journalist tem Bihar semdangi ogo.

Parnok March 16, 2026 nü

Dimapur Airport nungi apusoa ogo aser March 22, 2026 nü meyipa arutsü.

Sorkar schemes mapa küma inyakba, ministry balala indang sentongtem reprangtsü aser tanga tesemtem nungi journalist den ajurutepa sensaktsü atema iba

tour ayonga agir.

Iba telok nung Department of Information and Public Relations (DIPR) aser print & electronic media organizations nungi teshimtet nübotem den PIB, Kohima ketdangsürtem dena lir.

NDA-i Bihar Rajya Sabha 5 prong takok nguogo

New Delhi, March 16, 2026 (Agencies): National Democratic Alliance (NDA)-i Bihar nung Rajya Sabha menden pungprong nung takok nguogo.

NDA-i Chief Minister and Janata Dal (United) national president Nitish Kumar, Bharatiya Janata Party tir Nitin Nabin, Union Minister Ram Nath Thakur, Rashtriya Lok Morcha tir Upendra Kushwaha, aser BJP candidate

Shivesh Ram nunger toktepdaktsü. NDA candidate punguprongi Bihar nungi Rajya Sabha mendentem nguogo. Bihar assembly nung NDA MLA 202-i vote enoktsü saka opposition Mahagathbandhan nungi MLA 37-i dang shilem agia liasü.

Opposition tenüng nung Indian National Congress MLA tem- Manoj Biswas, Surendra Kushwaha, aser Manohar Prasad

Singh, nunger den Rashtriya Janata Dal MLA Faisal Rahman election nung maden.

BJP-i Congress MLA asem pur ao, parnok den March 13 tashibo tongtepratepa liasü. Parnok ya house arrest nung ayu ta Bihar Congress President Rajesh Ram-i ashi.

Bihar Legislative Assembly nung meden 243 lir aser Rajya Sabha menden pungu atema election agi.

State asoshi Mega Job Fair ka Dimapur nung ayongzüksü



Dimapur, Metsüremi/March 16 (TYO): Statewide job fair ka March 21, 2026 nü ayongzüksü aliba dak senakba nung March 16, 2026 nü Kohima nung Investment and Development Authority of Nagaland (IDAN) indang Conference Hall nung osangbener den jembidang, NSEDM-i lanurtem nem employment maongka agütsüsü aser lanurtem industry-i aginüba den sendakteptsü mangdang aliba nung shilem ka ama state wide Mega Job Fair ka March 21, 2026 nü ayongzüksü, ta Under Secretary and Project Manager (i/c), Nagaland Skill and Entrepreneurship Development Mission (NSEDM), I. Changsang-i metetdaksü.

Iba sentong ya National Institute of Electronics and Information Technology (NIELIT) den lungjemer IDAN kübok Integrated Business Hub and Innovation Centre, Forest Colony, Dimapur nung ayongzüksü.

Iba sentong ya state sorkari ayongzükba job fair tulutiba rongnung ka asütsü, aser ibai state nung private sector employment ajungkettsüsa yanglu, ta Changsang-i ashi.

Mapa aser tang tashinung

applicants tenüng agüja aliba nung tetsünga tulu aliba metetdaksütsü asoshi osangbener senden ya jazük, ta pai ashi.

Pai ashiba agi, tang job openings ya 6,456 lir saka tang tashinung register süa aliba candidates 326 dang lir.

Under Secretary and Project Lead, NSEDM, Meripeni-i ashiba agi, iba sentong nung sectors balala nungi national aser international recruiters 33 shilem agitsü. International recruiters ajunga tejangja lir aser timtem mali, kechiaser parnok ya Ministry of External Affairs kübok licensed süa lir, ta lai ashi.

Jangra aliba candidates temi QR code amshia jelia register sütettsü, koba ajanga iba sentong ayonger temi tajungba nung yariteptettsü aser iba job fair tajungba nung ayongzükettsü ta ashi.

Ajisüaka kasa anogo registrations agizüksü. Lai state nung mapa mangu aliba lanurtem dang iba maongka agitsü ajungshi aser tsürabortem dang pei tanurtem employment asoshi tenüng agütsüsü ajungmesotsü ayongzükba liasü.

Technical Officer and Placement Officer, National Institute of Electronics and

Information Technology, Moasunep Kichu-i ashiba agi, candidate registration system ya ochishia shimtsüsa aser applicants temi tapet employment opportunities jangjaba nung yaritsüsa renema lir.

Jangra aliba candidate temi QR code amshia angati register sütettsü, ta pai metetdaksü.

Portal nung register asüba sülen candidates temi company tenüng, vacancies kwi ali, itasen, mapa inyaksüba tesem aser mapa tejangja reprangtettsü. Applicants temi pei mulungba nung vacancies asem tashi shimtsü akok, ta ashi.

Registration tembangba sülen candidates tem WhatsApp group ka nung pasasa ioktsü aser ibaji ajanga grooming sessions aser orientation programmes indang osang agütsüsü, ta Kichu-i ashi.

Iba job fair nung tsüngtong arua shilem magiteter temi NIELIT Merima, Kohima; NIELIT Kohima Extension Centre Chuchuyimlang, Mokokchung and NIELIT Kohima Study Centre, S.P Office Compound, Mokokchung nung online teyari agitettsü, ta paisa metetdaksü.

DWSM Dimapur ita shia amenba senden menogo

Dimapur, Metsüremi/March 16 (TYO): Jal Jeevan Mission kübok linük tesem ajunga nung tzü wazüka ayutsüba campaign nung shilem ka ama Dimapur nung Jal Mohatsav Pakhwada 2026 ayongzükba liasü.

Iba sentong ya District Water and Sanitation Mission (DWSM) Dimapur ajanga PHED Urban Division, Dimapur den lungjemer DC Office, Dimapur nung March 16, 2026 nü March 8-22 tashi amungba nung shilem ka ama ayongzükba liasü.

Deputy Commissioner, Dimapur, Dr. Tinojongshi Chang, NCS-i iba senden nung jembidang, rural drinking water programme kübok inyakyim balala indang nükjidong lemsatepa liasü.

Sorkari ki o jen yanglua nüngdakba teyari agütsüdang, iba ama schemes tem mapang talangka takok ngua amshitettsü atema nüburtem dak tuluka keta lir, ta ashi.

Anungji yimtsüng ketdangsür aser nüburtemi teka amteper water supply systems aser danga public assets anepalua amshitsüla aser tebilemstü ajak nung sorkar kisüng dak metaloka malitsüla, ta pai ashi.

Terenlok maparen mapang talangka amshitsü atema nüburtem kibur akumba aser shilem agiba tongtipang lir, ta ashi.

Pai yimdaklir tem dang külemi teka amteper inyaksü aser sorkar schemes kübok agütsüba facilities ya shidak anepalua aser wazüka yua tarutsü putu ajangzükdaksütsü ajungmesoa liasü.

Executive Engineer PHED & Member Secretary DWSM, Dimapur, Er. Bendangtola Walling-i jembidang, 2019 nungi yimdak yimtsüngtem nung kilen shia nem tajemtsü tzü tajung agütsüsü asoshi Jal Jeevan Mission kübok infrastructure jenti yanglua arur, ta ashi.

Scheme aika renemogo aser tang item assets ya yimtsüng nem anepalua amshitsü asoshi amoktsütsü mapang lir.

Tang telidak anogo 15 Jal Jeevan Mission Pakhwada campaign ya March 8 nü International Women's Day nung tenzüka liasü.

Yimdak-yimtsüng nung water supply schemes tem yimtsüng ketdangsür nem magütsüdang itemji shidak ali asü mali ta jangjatsü atema "Jal

Aapke Dwar"/community engagement initiatives, system checks aser awareness sentong ayongzükba arur, ta lai metetdaksü.

Sorkari nüburtem dang digital platforms amshia water supply system nung temulung agütsüsü aser surveys agitsü sorkari ajungshir, ta ashi.

Yimtsüng nung tzü dak sendakba osettsüset wazüka ayuba aser ketdangsüba nung shilem agiba tetsür nem temaba jenjang nung sempet agüja tushitsü asoshi jangjatepar ta lai ashi.

Iba senden nung Jal Mahotsav Pakhwada 2026 amungba, Jal Jeevan Mission kübok tenzüka maparen inyaksüba, Source Sustainance Committees tentettsüba, aser yimdak yimtsüng nung tajemtsü tzü agütsüba shidak amshiba nung teinyaksü aser osangtsüsang indanga lemsatepa.

Schemes ya yimdaklir nem amoktsüba sülen water supply dak sendakba ken o balala achayangtsü atema District Technical Committee ka tentettsü indanga iba senden nung jembia liasü.

AR jawan tem nem ninang metsütsü training agütsü

Dimapur, Metsüremi/March 16 (TYO): Assam Rifles indang unit balala nungi jawans 139 asoshi anogo pongu Basic Beekeeping Training Programme ka 15 Assam Rifles Headquarters, Kashiram, Dimapur nung March 10-14, 2026 anogtem ayongzükba liasü.

Iba sentong ya Assam Rifles-i Nagaland Beekeeping & Honey Mission den lungjemer jawan tem nem ninang metsütsü asoshi yimya balala sayutsü nükjidong nung ayongzükba liasü.

Iba sentong nung shisalen sayur ya NBHM nungi C.

Francis Kikon, Athungo N. Nnullie aser Temjenchuba K. Char liasü.

Iba training mapang ninang metsüba yimya, ninang tabu balala, ninang tesem anepaluba, colony multiplications, seasonal management, ninang mojitzü agizükba aser ninang ajanga osettsüset balala yanglua ayokba indang sayua liasü.

Iba sentong nung shilem agirtem dang ninang metsüba ajanga libajen wazüka ayuba, pollination aser aluyimba nung tajangzük aliba indang angatetdaksü.

Red Cross Society, Nagaland Branch-i Angh Nand Kishore Yadav semdang



Dimapur, Metsüremi/March 16 (TYO): Red Cross Society, Nagaland Branch indang Managing Committee-i March 16, 2026 nü Lok Bhavan, Kohima nung Nagaland Angh Nand Kishore Yadav den ajurutepa liasü.

Iba mapang parnoki Angh dang state nung Red Cross Society ajanga nüburtem nem

teyari balala agütsüba indang tongmelang agi lemsatepa liasü.

Timtem nung aliba nüburtem tenzüka asoshi Angh-i Red Cross Society dang pelaba lemsatep aser maneni bendanga agütsür mapa tajung inyaksü aser Nagaland nung aliba nüburtem den yariteptsü ajungshia liasü.

Chümoukedima nung 9th North East Youth Festival ayongzüksü

Dimapur, Metsüremi/March 16 (TYO): Nagaland Angh Nand Kishore Yadav-i Chümoukedima Football Stadium nung March 18, 2026 nikongdang 5:00 ako nung 9th North East Youth Festival tenzüksütsü, koba Department of Youth Resources & Sports, Nagaland ajanga ayongzük aser Ministry of Youth Affairs and Sports, Government of India ajanga sponsor asür.

Hombarnü osangbener den jembidang, iba benjongmung ya Ministry of Youth Affairs and Sports ajanga linük lungjemtsü, sobaliba melentepba aser northeastern state ti nungi lanurtem iba sentong nung shilem agidaksütsü nükjidong nung yangluba lir, ta Director, Department of Youth Resources & Sports, Kethosituo Sekhose-i metetdaksü.

Iba benjongmung ya 'Ashtalakshmi - Celebrating Eight Forces of Youth and Progress' omen nung ajemdaker ayongzükba.

March 19 aser 20 nü sobaliba ken aser tsüngsang, declamation, one-act play, rock band aser instrumental guitar amala nung tetoktepba alitsü. Iba benjongmung nung shilem agir teshimtet kar Puliebadze, Jotsoma nung trekking aotsü aser Kohima nung World War II Cemetery semdangtsü, ta pai

shia. Iba benjong nung lanur 1200 shilem agitsü imlar, kong ajak agi shilem agir 1500 den Nagaland nungi volunteers 150, Ministry Youth Affairs and Sports, National Service Scheme, My Bharat nungi ketdangsürtem adentsü.

State Director of Mera Yuva Bharat, Nagaland Dr. Salam D. Singh-i ashiba agi, parnoki Tetso College nung Food Festival aser 'Yuva Kriti' (craft mela) ayongzüksü, kong stalls balala lapoktsü.

National Youth Festival ya küm shia Ministry of Youth Affairs and Sports ajanga ayongzükba, ta Regional Director NSS, North East Region Guwahati D. Carthigueane-i ashi. Tangbo iba ya tera melenshia Young Leaders Dialogue nungja agütsür amunger, kong Ato Kilonseri lanur den jembir.

Iba benjong nung state aser union territories ajunga nungi NSS volunteers 200 adentsü, ta pai ashi.

Iba benjongmung tembangba sentong ya March 21 nikongdang 5:00 ako nung Chümoukedima Football Stadium nung alitsü, kong Minister, Tourism & Higher Education, Temjen Imna Along sentong akhumdong ama adentsü.



Tamil Nadu Assembly elections magi tsungda Chennai nung Model Code of Conduct benoker aliba mapang Election Commission's Static Surveillance Team zungsemtemi security check ka ayongzuka agiba noksa nung angur.

ST. JOHN'S HIGHER SECONDARY SCHOOL, CHANGTONGYA
DIST : MOKOKCHUNG, NAGALAND.
POST VACANCY
 Applications are invited for the post of PGT Science at SJHSS Changtongya.
Qualification : M.Sc. (PCM) with B.Ed. Salary : Negotiable.
Contact : 9862191014 / email : takowait.1973@gmail.com

CPM pur Kerala nung menden 86 nung tokteptsü

Kochi, Metsüremi/March 16 (Agencies): CPM-i Thiruvananthapuram central atema candidate ya MLA Deobarnü sangdong ka ajanga Antony Raju anema okadaki parnok Kerala nung menden 86 obendang agütsüba sülen nung tokteptsü ta telemtetba agitsü, ta metetdaksüba den CPM-i metetdaksü. Party-i teyari teyari agütsüba Independents agütsüba Independent candidate aser tetsür candidate 10 T Ashok Kumar Puducherry densema candidate 81 tenung nung Mahe nungi tokteptsü. sangdongogo.

Iba osang sangdongba sülen Deobarnüsa CPM candidate temulung lema bilemba aikati yimtung nung election lemsatepogo, kechiyong Nava atema nüboyimba sentong Keralam yangertsü aser ayongzuka agia liasü. communal tashi anema raratsü

CPM state secretary, M V atema parnoki takok angutsü Govindan-i ashiba agi, kanga tongtibang lir, ta ashi. candidate 86 nungi party

candidate 75 alitsü. Ajisüaka opposition Constituency pongu-Koduvally, Congress' V D Satheesan-i Deobarnü ashiba agi, state nung UDF-i sorkar tentettsü. Paise, UDF indang candidate aser Tirur nung Independent tem list yakta sangdongtsü, candidate pongu mapang koba takok angutsüpur asar tatsüka lir sangdongtsü, ta paise shimogo, ta ashi. "UDF team metetdaksü. Chief minister kanga temulung lemteta aser Pinarayi Vijayan, Dharmadom nungi tokteptsü. Pa indang cabinet colleague terka aser election nung tokteptsü. tang MLA tinyakdak 54 iba election nung tokteptsü. G o v i n d a n - i s a ,

'Ozü kia maktetra makang': CMMamata Banerjee



Kolkata, Metsüremi/March 16 (Agencies): West Bengal mereploksüba osang chief minister Mamata angazükba sülen chief Banerjee-i Hombarnü BJP dak minister-i iba olen ya kokra lar ki aser tanga lemsatepa liasü, ta PTI-isa Trinamool Congress (TMC) metetdaksü. lenirtem ki amaksü jazükba Police-i ashiba agi, ken o den state nung lenirtem dak sendakba nung nisung pezü amaksü atema teyari agütsüba puogo aser iba tatalokba dak asoshi par party aija liasü. pudentsü atema jenjang agidar.

Kolkata nung nüboyimba Maneni minister Shashi'er ki sentong ka nung o jembiba amaksü atema BJP-i tasa asa mapang Banerjee-i, state ta shia lai parnok aitsüogo, aser minister Shashi Panja'er ki Ato Kilonser Narendra Modi-i amakba dak sendakba nung state nung rally ka nung shilem BJP nem tekümdangtsü agiba anogo iba lendong ya metetdaksüogo. adokdaksüba aija liasü

"Ni BJP dang ozü ki aser Hombarnüsa West Bengal tanga TMC lenirtem ki amaksü Chief Minister Mamata jazüker; onoki koda nokdangtsü Banerjee den Trinamool meteta lir," ta Banerje-i rally Congress lenirtem aser party nung ashiba news agency PTI- kübok telen balala nung i metetdaksü. inyakertemi LPG gas cylinders agi anungba dak sendakba nung centre sorkar anema longkak aita liasü.

J&K anentsü lendong nung nisung 1 asü; nisung 235 kümzükogo

New Delhi, Metsüremi/March 16 (Agencies): Jammu and Kashmir kübok Kishtwar district nung hydro-power project ka anasa anentsü aluba sülen nisung ka asü aser nisung ka yirua liasü aser kasa mapang nung tetsür tanur densema nisung 230 rürjep alaba ajanga taolen makai sabanger aliba kümzükogo.

Kishtwar aser kidanger Doda district nung tsüngsang kanga majungba ajanga kumdangshia atatsü asoshi kettangsurtemi kaket riju ajak Hombarnü shibangtsü asoshi tetuyuba agütsüogo, ta kettangsurtemi metetdaksü.

Tzünglu kanga sashia aruba sülen Deobar aonung aser Hombarnü na tsüngda anentsüh alua Kishtwar district kübok Dangduru anasa hydro-power project ka amenoka aliba tesem dak kongshi aser iba tesem nung mapa inyaker ana

anenbanga liasü, ta majungba den rürjep agi kettangsurtemi ashi. lenmang ajunga nokdanger

Mapa inyaker ana rongnung liaka teküzmükertemi kanga kabo sür lia ngutetogo aser ka tasü ita Sinthan top tonga ao yirur lia ngutet temang aser iba tesem nung sabanga anepalutsü atema mozükidangi aliba nüburtem nem chiyongtsü anirogo, ta parnoki ashi. talem, tzü aser tejenokdak agüja liasü. Repair aser

Tanga tatalokba ka nung recovery team temi garitem kettangsurtemi ashiba agi, yanglushitsü aser agitetsü police, Army aser civil makokba garitem nung mena administration longjemer aliba nüburtem teküzmükba Kishtwar kübok Sinthan Top nung rürjep kanga sashia alaba tesem bushia anir oa liasü. ajanga gari 38 nung nisung 235 taolen makai sabanger aliba kümzükogo.

"March 15 nü rürjep kanga sashia alaba aser tsüngsang kanga majungba ajanga Sinthan top nung nisung 235 taolen makai sabanger aliba angazüka liasü. Osang angazükba sülen White Knight Corps nungi sepaitem item nisungtem kümzüksü asoshi yoka liasü. "Tsüngsang kanga

"Tsüngsang kanga

Pakistan number ka dangi osang yokba atema nisung 6 apu

New Delhi, Metsüremi/March 16 (Agencies): Security office, investigative agency aser railway station amala nüburtem metiba tesemtem indang noksa mangaoka Pakistan nung züngoksema aliba bendanger nung nung lir.

"Honibarnü onoki Ghaziabad nung telok kati mobile phone amshia nüburtem metiba tesem aser security establishment tem tangokba indang osang

Item nisungtem yagi parnok inyakim nung shilem ka ama Delhi nung solar-powered CCTV camera ka amendaka tokja liasü, ta police-i ashi.

Police-i ashiba agi, aija alirtem ta Bijnor nung alir arishi küm 23 tain Suhail Malik; arishi küm 19 tain Praveen; Ghaziabad

kübok Kaushambi nung alir arishi küm 25 tain Mehek, Auraiya nung alir arishi küm 19 tain Raj Valmiki; Badaun nung alir Shiva Valmiki aser Shahjahanpur nung alir arishi küm 23 tain Ritik Gangwar nung nung lir.

"Honibarnü onoki Ghaziabad nung telok kati mobile phone amshia nüburtem metiba tesem aser security establishment tem tangokba indang osang angazüka liasü. Iba sülen temulung melemi bilemertem ya bushia oa Ghaziabad kübok Bhowapur tesem nung apu," ta additional commissioner of police (law and order), Ghaziabad Raj Karan Nayyar-i



Indian Youth Congress national tir Uday Bhanu Chib (teyong) den party kübok inyakertem Jantar Mantar, New Delhi nung India aser US na shishilembaba t s ü t s ü tenangzüktepba yanglutsü aliba anema longkak aitba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, FEBRUARY (METSUREMI) 17, 2026

Election junga agitsü merangtsüla

A jungbena ka dang ita kata mapang magütsü dang, Nagaland nunga Koridang assembly constituency nung by-election agitsü asoshi osang sangdongba ya junger ta bilemer, kechiyong anogo ishika tsungda election maparen ajak atemtsübaji election nung toktepertem asoshi khuret pongbadaktsüba mapa ka asütsü. Election nung ya sen agi vote alia mesenzüyonga, nübo yima jajaba mapang senotsü kanga endoktsüsa adoker, iba jagiang Election Commission-ia Assembly election nung toktepdang, asenok ama state aser constiutuency tila nunga candidate kati sen lakh 25 tashibo endoktsü melar. Aji oda, election agitsüba anogo sangdonger külen nungi election agiba anogo tashi nung candidate kati senotsü endokba osang tejangja renemer Election Commission nem agütsütsü lateta yuja lir. Atangji, ajaki tashi angaa Election Commission nem senotsü endokba osangji agütsü dang, Election Commission-i lateta yutsüba dak tali senjang kata meindok amai renemer agütsür. Ajisüaka, ashiko, asen lima ama nungbo voter meyrirjang 20 shi aliba assembly constituency tilaka nung sen crore ter metsüa endoka alitsüa akok. Ano külen bilemdangra, asenoki election ya senso kati ochishia inyakttsüba yimten mapa tongtibanga ta angatet nungbo, asenok ama voter ishika alidakbo sen lakh 25 jia meindoki election nung takok ngua tokteptetsü lenmang lir. Iba amaji, tang by election agitsü aliba asen Koridang Assembly Constituency nung atalokdaksüner. Tongtibang kaji, Koridang Assembly Constituency kübok aliba yimtem ya yimti tulutem dang lir, anungji alima yimten aser nübortem asoshi tajungji yimtisangertemi tenzüktetra, ibaji kin rangben asoshi temelenshi tajung ka tenzüker asütsü. Aji oda, asenoki beshiba yimten Democracy ya teimbai mulungba nung aoba yimten lir, tetezüji yimtisangertemi kechi ashir ta asüba ola sülen nübortem anidaker, anungji yimtisangertemi tajungleni anili alima tajung asütsü saka tamajungleni anira alima majungtsü. Ibaji yimtisanger asoshi khuret aser maongka lir. Ibaji bilemdanga, yimtisangertemi shiba yaridir yariaka, senotsü meindokdaksüi election nung toktepdaktsüra, madokyonga kecha balaka khuret tulubo masütsü aser adokra tashi ajak agi nübortem yaritsü. Ibaji dang masü saka yimti nungibo shiba idir iang nübortem nungdak reprangteta pi rongnung jembitettsüsa aser inyaktetsüsa nübo tajung, oda makümyonga chief minister mapaa dena bentettsüba nisung shimteta idaktsütsüla. Tanü tashi nung asenoki agia aruba election-tem meyipa reprangdangra, atangji, tesem aika nung yimtisanger lungjemer yariba candidate-tem aika lir. Ajisüaka, tangatetsü tasak kaji, yimtisangertemi lungjemer yariba candidate-bato sentsütsür kümdaktsür, anungji takaba temang yoktema yokaka yimtisangertemi yariba sentsü to maoteter. Kasaji, Dimapur ama nunga asen kini yariba candidate-bo sentsütsür kümdaktsür. Aji odasa asen kin aser asenok yimtisanger lungjemer yariba candidate-bo akümüli piyong nunga sentsü maotettsüsa sentsütsür kümdaktsür süra, asenoki lungjemer meyariang tajungba asütsü. Ibaji asenok ajaki kanga süoki ia bilemdangtsüla aser asenok yimtisangertem lungjemer komaka yariba agi election nung tadoker-temang sentsü tuluba aser madokertemang timtatamba ta ataloker. Iba ama tatalokba yagi asen yimti mainer aser asen yimti nung asatepba o assembly nung ola adokba na meputeper. Atangji, tashiyim amshia masü saka tangatetba nung lungjemer candidate ka yaribaji junger, saka lungjemer yariba agi candidate-sangji teyari angur masü saka sentsüang aoer maotettsüsa tsülokra, aji kechi komaka yariba agi yamaji ataloker(?) ta tanübo asenoksasa bilemdangtsübaji kanga tongtibang kümogo. Election-i aiba ya senotsü ajangzüksü atema inyakba business mapa ka masü saka nübortem business tajungba inyakdakja alima renlokaktsütsü asoshi shisatsü bendena tapet inyakyim, ozüng aser sentong latettsütsü asoshi aier, anungji aji angateta election nung toktepertemia yimtisangertemi lungjemer yariba nung sentsüang tsüloktsüsa angatetra, yimtisanger teyariji magiang tajungba, kechiyong aji teyari masü saka timtem agütsürba dang lir. Yimtisanger yaritsü asoshi kechiba yimtisanger alitsü? Aser yimtisangertem rongnung sarutepa lenir tajung adokdaksütsü melen, kechiba yimtisanger ajunga nisung ka dang ayoktsü?

OLEMSABANG

SEN TETEMLOK AGI APOSHIA AMSHIBA TAJANGZÜK ASER TAKOKSA

~ L. Kika Pongener

(Yashi adok nungi...)

Aji oda, sen tetemlok agi apotepa amshiba mapaji tai-a ta-ka mashir; saka sen apotsür aser sen apo'er anaprongla ajangzüksüsa timyim agi amshitsüla. Ano tanü asen lima nung lim arogo kar nungpo tasa balala agi sen tajangzük bushiba mapa inyaka alitsü akok; ibajia sentem/tetemlok agi sen apotepba denji kecha tepila mali asütsü. Aji oda, arogo-i iba ama amshitsübaji tim asü masü (?) Tatishitsü ka...Iba ama sen tajangzük bushiba mapa nungji mangatettep kar adoker ken o ashishitepra Arogo ka atema ibaji tobur junger majung asütsü (?) ta khen kanga junga shisadangdi.

Surabangla, sen sentem/tetemlok agi aposhia amshiba indang ya laishiba nunga koda shia lir (?) Ibaji khen bushidangdi. Levi kaket nung züngdangra...."Ne sosem adianu kar sensak denra aser pei tepok mesungra; pa taküm alitsü atema ne den semloka alir aener dang yariba ama nai pa dang yaritsüla. Pa nungi kecha nunga tetemlok tagi; saka Tsüngrem tsübuang aser ne adianu na anasa lidakjang. Nai pa nem sentem agi sen tapotsü; mesura na tajangzük angutsüsa chiyungtsü kecha teyok" (Levi-25:35-37). Ano Tenungsang ken kaket nung yamai zülua angur..."Shibai pei sen sentem keter maputsür aser tai makar anema supokrem magizüker; shibai itemi inyakdir pa kodanga marakzüksü" (T.Ken-15:5). Ano Apijemtsü shin kaket nung yamai zülua angur..."Shibai sentem aser tetemlok agi pei rongsen züindaktsür; sensakertem dang aria bilemsang asoshi aji bendener" (A.Shin-28:8). Item laishiba tapu aser tekong nung shia alibaji kanga junga shisadanger; sen tetemlok (Interest) keter aposhia amshiba ya Tsüngremi mulungba asü masü (?) Mesura laishibai melaba mapa asü masü...??? Asenok ajaki pei sasa kanga junga shisadangdi....Ajiser, amshitsüla asü (?) Mamshitsüla (?) Ibaji pei sasa angateter tajungba inyakdi. Kari amshitsü tima ta angatetra; nubur asoshi takoksa dang nungipo tajangzük tuluba asütsüsa timyim agi amshitsüla.

Temalen shisemba ama....Sen sentem/tetemlok agi aposhia amshiba ya ni kü tangatetba agibo tai-a ta-ka mashir; saka sen sentem/tetemlok agi aposhia amshiba yagi; sen apotsür kibur aser sen apoa amshir anapronglaji ajangzüksüsa timyim agi amshitsüla. Sen sentem/tetemlok (Interest) Govt. temzüngi melaba amai kangabo tali-tapong agia mamshitsüla. Sen sentem/tetemlok (Interest) agi sentong (Principle) kümdaktsüba iba yayim yabo mebenshitsüla. Sen apoa amshibaji maka-maiter, sensaker timtemertemi teimba apoa amshir; anungji tashiyim agi masü; saka timyim agi, akokba tashi lenji-i oa taochi sayua inyaktsüla. Akok ka asübo arogo-ibo sen sentem/tetemlok agi; mesura tasa balala agi sen tajangzük bushiba yabo mamshiba-ang tajungba asütsü ta nibo shisadanger. Ashiko, kü tangatetba-jiang tai tangatetba asü masü'ar nibo iba amaji dang angateter. Kechiyong iba ama mapa nung ya teti tajung dangpo masütsü sudi....Aji oda, nisung ajak küsa masüji, nisung kari mapang shitak nung magutsütetra; mapang kar nungpo ken o bulua ashishiteptsü akok.... Idangji Khristar arogo kaji alima matsüngdang tenung menuka tetla-tetshitsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Marian kerakyanglu raksatsüba atema police-i nisung ana apu



Telangana state kubok Secudarabad yimti nung aliba St. Mary's Pharmacy College kima Marian kerakyanglu ka March 13 nü raksatsüba anema Catholic nungeri temo milen amer longkak aitiba noksa nung angur.

Secunderabad, Metsüremi/ March 16 (Agencies): Marian kerakyanglu raksatsüba mechi Telangana state police temi Hindu nunger ana puogo, koba ajanga arogo lenirtemi Khristanpur anema mapa tamajung inyakba ya north len nungi south tsütsüi prokshia aor asü ta süngmangteper.

"Secunderabad nung iba ama timtem ya tang mezüngbuba agütsü, kong Hyderabad Archdiocese lir," ta archdiocese indang procurator aser chancellor Father T. Victor Emmanuel-i UCA News dang March 15 nü ashi.

Iba kerakyanglu raksatsür anogo ka lir March 14 nü aibelenertem apu ta putiri ashi aser police temia nisung ana ya iba kerakyanglu raksatsüdang yi agi meseper liasü ta ashi.

Police temi iba tatalokba indang bushisüngdangtsü sangdongogo. Ajisüaka iba ken o züluoka aliba Gopalapuram police station dangi call asüba magizük.

Catholic Association of Hyderabad ajanga March 13 nü sangdong ka nung iba tatalokba ajunga CCTV camera tem nung

tangoka liasü ta ashi.

Footage nung nisung ana ya tejak zübanger two-wheeler ka nung March 13 anepdang 3:00 ako meta aru.

Tenati aiben meranger keraklong indang aina jaksatsü, keraklong agizüka ali nung laodaktsü aser long agi jaksatsü, ta sangdong ajanga ashir.

"Iba mapa tamajung inyaker temi parnok gari indang number plate nembang, anungji sentong kanga kumdanga atonger inyak ta sayur," ta ashi.

Catholic Association of Hyderabad indang coordinator aser taoba tir James Sylvester-i ashiba agi, tamangba yimsü maitsü temeshi ka asaa raksatsüba atema Catholic nungeritem süngmanger aser kanga jashir.

"Khristanpur anema mapa tamajung inyakba ya tangbo India north tsütsü nungi south tsütsüi prokshia otar," ta pai UCA News dang ashi.

Osangbener tejen aser All India Catholic Union indang odongtar John Dayal-ia iba ama mapa inyakba nungya tangatetsü lir, kechiaser Secunderabad yimti ya tang

Catholic Bishops Conference of India (CBCI) tir indang menden lir ta ashi.

Cardinal Anthony Poola of Hyderabad ya Indian Catholic bishops' national body indang tekolakba inyaktsü February 7 nü shima iba mapa inyaker Dalit nunger pa mezüngbuba akum.

Secunderabad ya Hyderabad indang 'twin city' aser Telangana indang yimtiba lir. Iba state nung Congress party-i yimsü asür, shirnoki secularism aser democratic values wazüka ayutsü nangzüka lir.

Catholic association-i state sorkar dang iba tatalokba bushisüngdangtsü, tanaben yamaji inyakba nungi nokdangtsü aser minority nisungtem aser parnok indang institutions kumzüka ayutsü ajungshia liasü.

Telangana nung Khristanpur minority lir, kong nütsüng yongsük 35 million aliba nungi tamanger 1.2 million lir.

Khristanpur timba makamait Dalit castes nungi lir, aser iba state nung Khristanpur tesadang ka Catholic nunger lir.

ANOGO ABEN TSÜNGREM DEN

Senti Senmang

T. Ken 147: 12-20

Tejen Lai iba maongka Israel nunger nem agüja liasü. Iba indang ken züluri T.Ken 147: 12-20 nung ashir. Pai Yihuda Tsüngremi parnok asoshi inyakba asoshi Pa tenüng asangtsüla ta ashi. "Kechiyong Pai ne süngküm tartangtsü, tashi itdaktsü. Pai ne chirtem ne dak moatsü" (t.13). Pai parnok artsü nung yimjung agütsü. Pai parnok mesü. Pai parnok nem Pa O aser ozüng agütsü. Pai parnok nem alinük agütsü. "Kin kecha dang Pai yamaji meinyak: aser Pa O bendangba indang, parnoki itemji metet. Nenoki Kibuba sangang" (t.20). Tsüngremi Israel nunger nem Pa senti O agütsü.

Ken züluri Tsüngrem O indang kechi ashir? Tekong 15 nung Tsüngrem ta ashir: "Alima madak Pa temelaba yoker; Pa O kanga karaa aor" (t.15). Kodang Tsüngremi jembir Pai jembiba O Pa nükjidong atalokdaktsütsü asoshi tekara osang abener ka ama aor. Tsüngremi Pa O agi alimaji azüoker. Pai ozüng agütsür aser mapatem ataloker.

Tsüngrem Oi temerang oset yimsaa odaktsür. "Pai ozüng agütsür, aser parnok yimsadaktsür" (t.18). Tsüngrem Oi temulungjang temokong aser temerang yimsadaktsür. Nai tamakoktsü tia kar ajurur asü? Tsüngrem Oi tartangtsü ajak raksatsütsü aser ne nem kechi lapoktsütsü.

Tatamsa, Tsüngrem Oi moatsür. "Pai pei O Yakob ang ... parnoki itemji memetet. Nenoki Kibuba sangang" (t.19,20). Tsüngrem Oji zügang. Ibai rongsen tulu lir, kodang ne taküm nung rizüngdir tejang atanger.

Tsüngrem O kara aor aser nükjidong ataloker. Iba yagi yimsadaktsür aser leman lapoktsür. Aser iba yagi tagizüker ajak moatsür, iba tashi angang aser amangang. Tsüngremi anogo shia Pa O agizükdaktsünür. Nai ne taküm nung Pa O rizünger asü?

Indian nun temi mepishiba court-i magizük

Jabalpur, Metsüremi/ March 16 (Agencies): Catholic nun kati ozüng alema tamangba yimsü melendaktsü ta tai tonglokja aliba ken o ka Madhya Pradesh nung tematiba court-i agientsü memulung, koba la aser la bhukumer temi tiazü ken o lir ta ashir.

Madhya Pradesh High Court indang Jabalpur bench-i ashiba agi, Satna diocese nung inyaker Sister of Destitute, Sister Bhagya anema benoka aliba ken o agientsü metemsü.

Court-i nun anema criminal proceedings meshi, shiba Chhatarpur district kubok Khajuraho nung aliba Sacred Heart Convent High School nung taoba mapang principal

inyaka liasü.

Justice Vinay Saraf indang single-judge bench ajanga March 9 obendang nung, petitioner indang ken o jembitsüsa tai tonglokja aliba ya teperi lir, ta ashi, koba March 14 nü yimjak nung sangdonga liasü.

Nun anema ken o ya February 2021 nung benok aser iba mapang nun ya school principal inyakba liasü. Iba school nung tesayur inyakba alisang Ruby Singh, shiba mapa nungi 2020 nung anentsü, pai nun anema ken o ya police nem agütsü ta ashir.

Singh-i junga mesayur ta osang aruba sülen la mapa nungi anentsü ta school ketdangtsür temi ashi.

Ajisüaka 2016 küm nungi iba school nung tesayur inyakba arula Singh-i ashiba agi, nun-i la dang la Hindu yimsü yutsür Catholic akumtsü ajungshiba sülen manodakba yong mapa nungi anentsü.

Nun-i state indang anti-conversion law tesashi nung aibelen ta lai ken o benok. Iba ozüng kubok tashiyim amshia, mesüzüka mesüra ashikülak yimya amshia tamangba yimsü melentsü memelar.

Nun-i item taitüsü ya tiazü aser tesayur mapa nungi anentsüba tayang kepzükba lir ta ashir.

Sisters of the Destitute provincial Sister Smitha Vembilly ya New Delhi nung lir, aser parnoki ochi obendang

asoshi maneni raratsü ta ashir.

"Tang iba totuyuba ya Supreme Court dangi abentsü mesüra high court ajanga tuyuba ama ken o jembia trial court nung la tai mali ta kuli sayutsü lenmangtem lir," ta nun-i UCA News dang ashi.

Iba ken o achayanger Catholic putir kati, High Court totuyuba tetetzü nun ya tai ta ashir masü, ta UCA News dang March 16, 2026 nü ashi.

Iba ken o ya complainant nungi kuli tiazü agütsüba nung ajemdaker lir aser item kuli metentsüsa bushisüngdangeri 'material evidence' kecha mongutet, ta putir yagi ashi.

India nung anti-conversion laws tesashi benokba state 12 rongnung Madhya Pradesh ya

ka lir.

Hardline Hindu nunger telok aser activists temi tim masüba nung iba ozüng amshia makamaiter aser tepetzük jenjang nung aliba nisungtem den inyakba Khristanpur anema tiazü nung tamangba yimsü melentsüba ken o benoker, ta Khristanpur lenirtemi ashir.

Madhya Pradesh ama Hindu bhukumba Bharatiya Janata Party-i yimsü asüba state timba nung bishops, putir, nun aser tamangertem anema iba ama ken o benoker.

Madhya Pradesh nütsüng yongsük million 72 shi aliba nungi shilem 80 shi Hindu nunger lir. Iba state nung Khristanpur ya shilem ka dang tajemba lir.

AO OSHI ANGAZÜKDAK:

TANÜ ANGAZÜKTSÜBA OJANG



Waka

(n) kikalaktsü nung tezüknem adokba (foul smell of armpits)

* Waka memenemtsü atema teti tzü chigutsüla.

Wakbang

(adv) tulu küma awak (enlarge swelling)

* Ninang agi metakba agi tejak ajak wakbang.

OLONG PAITEP # 7446

Grid for Olong Paitep # 7446 with numbers 1-15 in various cells.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _____ kibur - (5)
13. Tebur tembar tsüngda jatepba - (4)

OLONG PAITEP # 7445 TELANGZÜBA


TIPLÉN :

- 2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu, 15. Raksa,
16. Arameso.

LANGTSÜNGLEN :

- 1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER



United Kingdom nungi adianu ana Matthew aser Thomas Pidden nati robot ka amshia four-by-four Rubik's Cube ka tekaratiba nung inyaktetba Guinness World Record ajatetogo. Tenati yanglutetba DIY machine dang The Revenger ta ajar aser iba robot ajanga second 45.3 nung dang puzzle solve sütetogo.

Matthew aser Thomas nati University of Bristol nung hopta 15 tsüngda iba robot yangluteta liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Nagaland-Manipur truck rongdoktsür ka puogo



Imphal, March 16, 2026

(Agencies): Dimapur nungi Imphal tashi tashi khu abenba truck kari ka mi agi rongdoktsüba ken o nung tongti süa tai tongloksüsang puogo.

Iba ya March 2, 2026 nü Senapati district kübok Kabinam nung atalok aser Manipur Police-i iba ken o nung tongti süa tai tonglokja alisang apu.

Iba nisung ya Sathphang Vashum'er jabaso Ramayo Vashum (51) ta jangjaogo aser pa ya Senapati district nungi lir. Manipur police-i mita aodang Kathiko Karong, Senapati nung pa apu.

Senapati district nung Officer-in-Charge, Shivin, IPS (P)-i lenisüba kübok telok kati osang kar angazükba nung ajemdaker mita ao.

Senapati nung Sub-Divisional Police Officer (SDPO)-i aniba telok ka aser Special Operations Team (SOT)-i iba mapa inyaka

liasü.

Iba mapang pa ket nungi mobile phones ana ngutetogo aser pa dang asüngdangya asüdang pai amshiba gari bushitetogo.

Iba gari senzüba ya lendong atalokba anasa CCTV footage nungi kuli nguogo.

Ramayo Vashum ket nungi Gypsy (MN08 A0099), Vivo Y200 mobile phone aser Kechaoda K66 keypad mobile phone ngutetogo.

Iba anogo nung nisung anati prangpong bener truck gari (NL07AA 2863) sot aser gari nung mena alir nisung asem anir aoba sülen gari nung mi senoktsü ta police-i ashi.

Iba gari ya North East Federation of Trade Unions (NEFTU) nung General Secretary indang lir ta osang angazüker.

Iba tatalokba nung shilem agiba tanga nisungji aputsü

atema merangdar.

Maram Students' Union (MKS), ANTAM, aser NEFTU dena civil society teloktemi iba mapa inyakerem aputsü takhangba agütsüba ajanga police-i mapang shitak nung mapa inyak.

Külen, National Socialist Council of Nagaland/ Government of the People's Republic of Nagalim (NSCN/ GPRN)-ia Ramayo Vashum apuba parnok dangi shiogo ta metetdaksüogo.

Vashum ya Naga Army nung taoba Major ka liasü aser pai tim mesüi inyaksangshiba agi 2022 nung forced retirement agütsü ta NSCN/GPRN-i jangjatsüogo.

Pai ozüng alema inyaksangshiba atema sasa bilemstür aser iba ya pa kijai inyakba aser telok den kecha sendaktepa mali ta parnokisa ashi.

Manipuri film Boong-i box office nung Rs 1 crore adenogo

Imphal, March 16, 2026

(Agencies): BAFTA award angur Manipuri film Boong-i box office nung Rs 1 crore

ajangogo aser iba jenjang atongba Manipuri film mezüngbuba kümogo.

Boong film ya Lakshmi Priya Devi-Ii direct asü aser Excel Entertainment, Chalkboard Entertainment o Suitable Pictures ajanga produce asü.

Tawa tu Boong ajanga Best Children's and Family Film

atema BAFTA award nguogo. Iba benjung ya February 22 nü Royal Festival Hall, London nung munga liasü.

Boong film ajanga international recognition anguba sülen March 6 nungi theatres nung sayutsü tenzüka liasü.

Iba film nung Gugun Kipgen-i tongti shilem agir. Boong indang otsüji tanur kati par kibong tanaben longjemdaksünüba indang lir.

Tanubosang ya tetsü dang

aniteter aser pai par tembar den külemi tebu bushii aoer. Iba film ajanga teimla, akanga noktakba aser tanur o tetsü tsüngda tesentaktep takang aliba indang sayur.

Lakshmi Priya Devi-i tang mezüng atema Boong film ya direct asü. Iba film ya 2024 nung Toronto International Film Festival nung sayu aser iba sülen International Film Festival of India o MAMI Mumbai Film Festival dena tongtipang benjung aika nung sayuogo.

Assam Rifles-i Khonsa nung artificial limbs lema agütsü

Dibrugarh, March 16, 2026

(Agencies): Assam Rifles-i Deobarnü Arunachal Pradesh nung Operation Sadbhavana kübok artificial limbs lema agütsüogo.

Iba sentong ya Khonsa nung agi aser Tirap o Longding district nung alirtemi tajangzük nguogo.

Iba sentong ya Assam Rifles nung Khonsa Battalion ajanga ayongzük aser matamabensar nem artificial limbs agüja yaritsü nükjidong nung agi.

Tirap aser Longding district tem nung matamabensartem jelia jangjatepa liasü aser parnok nem artificial limbs agütsüba den amshiyim sayua liasü.

Iba teyari angurtem aser parnok kinungertemi Assam



Rifles dang pelaba alirtem yaritsü aser ajungkettsü metetdaksüogo.

Operation Sadbhavana kübok ibala maparen ajanga Assam Rifles-i meta talang pilar

meranger. Ibala mapa ajanga Tirap aser kidang district tem nung civil-military relations akangshir.

2021 sülen tang mezüngbuba Myanmar parliament session ka menogo



Yangon, Metsüremi/March 16 (Agencies): 2021 küm military-i sorkar atsüngba sülen Myanmar nung tang mezüngbuba parliament session ka ayongzüka menogo. Tawa agiba election nung military-i teyari agütsüba party-i menden timba koka liasü. Iba election nung opposition party tongtibangtem tokteptsü memelai liasü.

December aser January ita election shilem balala lemsa agiba sülen Hombarnü parliament tasenba lapoka liasü. Iba election ya pro-military Union Solidarity and Development Party (USDP)-i kokogo.

Upper aser lower house nung menden 166 military atema mekazüka toktsü aser tanungba menden nungi USDP-i menden 339 akok. Maneni

party metsür kati menden ka nungi 20 tashi koka liasü.

Hombarnü mezüngbuba session amenba mapang military-i teyari agütsüba USDP mendenbuba Khin Yi lower house sepeaker asütsü shima liasü. Pa ya taoba mapang general ka aser police chief liasü aser Myanmar military yimsüsür Senior General Min Aung Hlaing den kanga junga sendaktepa aliba nisung ka lir.

Kasa mapang nung züngsem pongu agi kümtetba Union ?Consultative Council tasen ka amenoktsü, koba mongintemi ashiba agi, "superbody" ka aser iba ajanga Min Aung Hlaing nem military aser civilian administration naprongla azüoka ayutsü asoshi tashi agütsütsü.

Union Election Commission-i ashiba agi, parliament upper house Bodhbarnü ajuruteptsü

aser joint session ka Hokolbarnü agütsü imlar.

Myanmar nung tatembangbuba election ya 2020 küm November ita agi, koba Nobel Peace Prize ngur alila Aung San Suu Kyi-i aniba National League for Democracy (NLD)-i kanga junga koka liasü. Military-i election inyakyim nung ochi mashi mapren sendaka lir ta shia iba result magizüki liasü.

Iba sülen February 21 nü military-i Suu Kyi aser tanga NLD lenirtem apu aser state of emergency ka benokba sülen tashi ya military nem agüja liasü. Military-i sorkar atsüngba sülen linük ajunga nung nüburtemi longkak ait tenzü.

2021 küm coup sülen Myanmar nung civil war adoker lir aser nüburtim million aika mepetmesü agi kongshir lir.

April ita nungi tayimtsü ishiba senzüdaktsütsü Vietnam renemer

Hanoi, Metsüremi/March 16 (Agencies): Vietnam nung ketdangsurtemi linük aviation industry dang April ita nungi tayimtsü ishiba senzüdaktsütsü asoshi renemtsü metetdaktsüogo, kechiyong Iran nung rara adoker aliba ajanga China aser Thailand nati tayimtsü totzü export asüba anena lir.

Vietnam-i tayimtsü totzü asem sü nung anadak tema tangalen nungi bener arur aser item rongnung China aser Thailand nung nisung 60 bener arur.

"April ita nungi tenzüka Vietnamese airline tem atema tayimtsü totzü agi anünga akümtsü ana nung lir," ta Civil Aviation Authority of Vietnam-i March 9 nü transport ministry dangi yokba shiti nung shia lir.

Parnoki ashiba agi, airline temi parnok indang sentongtem lepreprangshitsüla aser talisa domestic tayimtsütem asadangshitsüla. Parnokisa airport operator tem dang Vietnamese ?carriers tem anena ayutsü asoshi parking talila renemtsütsü tetuyuba agütsüogo.

Kasa mapang nung Singapore-ia Vietnam nem supply tajemba yokba iba shiti ajanga sayuogo.

Tanga osang ka ajanga importer Petrolimex aser Skypec nati tayimtsü totzü March ita tashi dang agütsütsü ta ashiba angazükogo. Skypec-i, rara manenteti ora tayimtsütem tongtibang lenmangtem nung dang senzüdaktsütsü asoshi ketdangsurtem dang mepeshia metetdaktsüogo.

China-i linük nung refiner tem dang iba ita tetenzüklen export tasen atema tenangzüktepba meyanglutsü mepeshiba den March 11 nü refined totzü export masütsü tenokdangba agütsüba sülen kuli kakat ajak ya agüja liasü. Thailand-ia, Myanmar aser Laos na dak alia tanga linüktem dangi tayimtsü totzü densema refined oil products tem kecha export masütsü tetuyuba agütsüogo.

Australia aser Japan na sülen Vietnam ya taoba küm China dang nungi aviation kerosene timtiba alirtem rongnung tasembuba liasü.

Southeast Asia nung aliba

linük yagi ken o ya China, supplier aser Thailand den benoka sensaksemogo.

Deobarnü Foreign Minister Le Hoai Trung-i China Foreign Minister Wang Yi dang Hanoi nung senden ka amenba mapang energy security atema sendaktepa inyaksü asoshi shiogo, ta Vietnamese sorkar news portal-i metetdaktsü.

Chinese foreign ministry otongdar kati Hombarnü osangbenertem dang ashiba agi, energy security ken o bentettsü atema Vietnam aser tanga linüktem den longjemer inyaksü asoshi Beijing renema lir.

Hokolbarnü Vietnam dangi T h a i ambassador den senden amenba mapang Ato Kilonser Pham Minh Chinh-i totzü agi a n ü n g b a m e s e m t s ü asoshi Thailand dang teyari meshia liasü.

EU lenirtemi Strait of Hormuz nung mitkar yoktsü memulunger

Brussels, Metsüremi/March 16 (Agencies): United States Tir Donald Trump-i Strait of Hormuz nung rong senzüba nung timtem majurudaktsütsü asoshi yaritsü akhangba European lenirtem magizüker aser European Union nungi foreign minister tem Brussels nung adenshia US-Israel nati Iran den raraba ajanga totzü jenjang timba akumba indang jembishini akar.

Hombarnü Germany Foreign Minister Johann Wadepful-i, rara nung military operations nung adentsü Berlin tebilemba mali, ta shiogo.

"US aser Israel nungi onok nem osang agütsütsü, yangji parnok kechi inyaker, idakji onoka dendaktsütsü aser item nükjidong tongteter asü masü ta onok dang ashitsü imlar," ta pai Brussels nung senden metenzükdang osangbener dang ashi.

"Iba indang tejangja metetba sülen ang kidanger linüktem den külemi mera agütsü," ta pai ashi.

Tongtipang Gulf tzülenmang wazüka ayutsü asoshi naval coalition dang warship yoktsü Trump-i Deobarnü ayongzükba sülen, Strait of Hormuz nung mapa inyaksü NATO-i telemtetba kecha magi, ta Wadepful-isa ashi.

Rara mechi iba strait ya shibanga lir, kong US aser Israel nati February 28 nü nungi tenzüka anogoshi Iran dak kanga sashia makyonga arutar. Iran-i tayang kepzüka Middle East tesem balala nung missiles aser drones khalokja alima nung energy markets kanga tim atemer.

Trump-i linük balala dang iba tzü lenmang kumzüka ayutsü ayongzükba nung European linük aikati telangzüba tajung magütsür.

Hombarnü Greek sorkar indang odongtar Pavlos Marinakissaid-i ashiba agi, Strait of Hormuz nung military operation kecha nunga Greece madentsü. Kasa mapang Italian Foreign Minister Antonio Tajani-ia iba tesem nung naval missions kecha nunga Italy madentsü ta shiogo.

Iran den rarai aotsü asoshi US aser Israel nati telemtetba agiba nung Europe medenaka strait nung rong timtem majurui

senzütsü asoshi yaritsü atema tangatetba tajung alitsüla, ta Denmark Foreign Minister Lars Lokke Rasmussen-i ashi.

Tensa tajungba kumdaktsütsü tangatetba nung EU-i sentong ka yanglutsüla, ta pai ashi.

Kasa mapang United Kingdom-i Strait of Hormuz tanaben lapoktsü aser Middle East nung freedom of navigation alitsü asoshi arok külemi sentong yanglutar, saka temela masütsü ta ashi.

Iba tzü lenmang tanaben lapokba nung EU-i komala yimya ka nung shilem agütsü ta bloc indang lenirtemi jembitsü, ta EU foreign policy chief Kaja Kallas-i Brussels nung senden mamandang ashi.

"Onoki mezüngbuba nung züngsem linüktemi Strait of Hormuz nung kechi inyaksü jangra aliar, aji jembitsü nüngdaker. Strait of Hormuz lapoktsü nüngdaka ya lir," ta lai ashi. Iba strait shibanga ajanga totzü jenjang barrel ka nung sen \$100 dak tema kumogo, aser iba yagi Ukraine den raraba Russia linük ajangzükker, ta Kallas-i ashi.

Deobarnü Financial Times den sensaksemba mapang, strait nung military operation ka atema ni asüngdangba nung telangzüba tajung melira tarutsü asoshi NATO tia kanga majungtsü, ta Trump-i shia liasü.

France-ibo EU indang Aspides mission ya ulushinung ajungtsü ta ashir, koba Red Sea nung Houthis temi amakba nungi rong tem kumzüka ayutsü asoshi 2024 küm tenzüka naval mission tilaka lir.

Ajisüaka EU züngsemtem nungi iba sentong nung shilem agütsü mejangraba linüktem rongnung Germany dena lir.

"Strait of Hormuz nung tashi tulu aliba US Navy-i meinyaktetba nung European frigates teka ka mesüra ana sünga agi kechi inyaktettsü Trump-i imlar?" ta German Defence Minister Boris Pistorius-i Berlin nunga shi.

"Ibai asen rara masü. Asenoki ibai metenzük."

Tarutsü NATO tia asoshi Trump-i jembiba indang asüngdang dang, iba ken o mechi alliance raksatsü meimlar, ta Pistorius-i langzü.



Advertisement No 02/2026
CENTRAL SANSKRIT UNIVERSITY
Established by an Act of Parliament
56-57, Institutional Area, Janakpuri, New Delhi-110058
Website: www.sanskrit.nic.in

**RECRUITMENT OSANG**

Central Sanskrit University, Delhi ajanga India nunger dang nungi **Non-Teaching Posts** balala [Registrar-01, Assistant Registrar-02, System Analyst-03, Section Officer-11, Nursing Officer-03, Assistant-10, Guest House Manager-03, Junior Engineer-03, Personal Assistant-03, Professional Assistant-04, Technical Assistant (Shikshashastra/Education Lab.)-03, Technical Assistant (Computer Lab.)-04, Stenographer-08, Upper Division Clerk-16, Library Assistant-01, Lower Division Clerk-35, Driver-01, Multi-Tasking Staff-22, Library Attendant-08 & Medical Attendant/Dresser-03] atema applications meshir.

Item mapa asoshi eligibility criteria, qualifications, age limit, recruitment process, distribution of vacancies, application procedure, scheme of examination, selection process aser danga tongtipang nüngdakattem indang CSU indang website www.sanskrit.nic.in nung 16.03.2026 nung agütsüba advertisement no. 02/2026 kübok recruitment/notification head nung angütsü. Jangra aliba candidates ajunga dang application magütsüdang advertisement jungjunga reprangtsü ajungshir.

Date: 16.03.2026

CBC 21212/12/0007/2526

Sd/- REGISTRAR /c

Sabalenka-i tang mezüngbuba Indian Wells title benogo



Metsüremi/March 16, 2026 (Agencies): World number one Aryna Sabalenka-i Deobarnü Indian Wells tetsür kija asaya final nung Elena Rybakina 3-6, 6-3, 7-6(6) agi koka tang mezüngbuba iba asayamung akokba den la indang career nung asayamung 23buba koktetogo.

Belarus tsürla ya iba asayamung nung taoba mapang anaben tashi final nung tsüker liasü, kong 2023 küm final nung lai Rybakina makokba densema liasü. Laisa taküm küm tetenzüklen January ita Australian Open final nung arishi küm 26 tain Kazakh tsürla ya mekoki liasü.

Grand Slam ana koker alila Rybakina-i mezüngbuba set amokbanger asaya aser Sabalenka indang serve ka break süa la 4-2 agi tejakdang aküm aser iba sülen kanga timtem mesüi asaya kokatok.

Iba set makokba ya Sabalenka asoshi iba asayamung nung mezüngbuba set makokba liasü.

Tanabuba set nunga mezüngbuba game nung Rybakina-i Sabalenka indang serve breaksüa liasü, saka Grand Slam pezü koker aliba Belarus tsürla yagi meyiper tanabuba game nung Rybakina indang serve break süa 1-1 aküm.

Game pezübuba nung Sabalenka-i maneni serve ka break asüba sülen la 4-1 agi tejakdang aküm. Rybakina-i kanga nongshia asaya saka Sabalenka-i aibelen aika memenai kanga junga asayateta tanabuba set 6-3 agi akok.

Decider ya asayar ana tsüngda kanga toktepa asaya liasü. Sabalenka-i asaya tetenzüklen serve ka breaksüa la 3-1 agi tejakdang aküm ajisüaka Rybakina-ia kanga junga asayateta 5-5 ta kasasa aküm. Asayar ana ya kanga

toktepa asayaba sülen tiebreak asayatsüsa aküm koba Sabalenka-i koka liasü.

"Ni Elena nem tenüsang agütsüner. Küna aiben ajuruteptsü ta ni meteta lir. Iba asayamung ayongzükertem dang kanga pelar. Ni kümshia iba asayamung nung asayatsü kanga janrar aser iba takok marok koktetba atema Tsüngrem tenüng asanger," ta Sabalenka-i takok marok agizükba sülen ashi.

"Iba ya kü nükjidong atalokba ka lir. Ni kü team aser fiancée nem tenüsang agütsü. Iba hopta azü chanu ka anguba den ni engage asü aser iba den takok angutsü ya koda jangrademtsüka. Ni iba ya kü taküm tepeyong bilemtetsü," ta laisa shisem.

Sabalenka aser Rybakina na tang tashi nung 16 ben asaya lir, koba Sabalenka-i 9 ben aser Rybakina-i 7 ben koker lir.

Sinner ya Masters 6 prongla akokba asaya tanobusang kümogo



Metsüremi/March 16, 2026 (Agencies): Indian Wells Masters final nung Daniil Medvedev 7-6 (6), 7-6 (4) agi koka Jannik Sinner-i taküm mezüngbuba asayamung kokogo aser iba den otsü tasen ka yangluogo.

Iba asayamung akokba densema Sinner-i tang tashi nung tour-level title 25buba benogo aser iba den pai alizünga tasen ka tongtetogo.

California nung iba asayamung akokba sülen Italy nung asayar yagi ATP Masters 1000 hard-court titles trokprongla kokogo, kong Miami, Canada, Cincinnati, Shanghai aser Paris nung

Masters asayamungtem densema lir.

Final asaya ya tetenzük nungi Sinner-i amokbanger asayar aser pai winner 28 angu aser ace 10 oteta liasü.

Sinner ya Hard-court Masters asayamung trok prongla akokba mezüngbuba asayarbo masü, saka pa ya 1990 küm Masters 1000 series tenzükba sülen Masters asayamung trok prongla akokba asayar tanobusang kümogo.

Arishi küm 24buba nung pai iba alizüng tongtetogo, koba Roger Federer aser Novak Djokovic napronglai arishi küm 30 ajungba sülen tongteta liasü. Federer-i 2014 küm

Shanghai nung Masters asayamung akokba sülen arishi küm 33buba nung Masters asayamung trok prongla akok, aser Djokovic-ia arishi küm 31buba nung 2018 küm Cincinnati Masters koka iba alizüng tongteta liasü.

Kasa mapang nung iba asaya akokba densema Sinner-i Masters 1000 level nung asaya 100buba kokogo.

Pa ya 2001 küm aso aser pa ya 2000s nung asoba asayartem rongnung iba alizüng tongtetba mezüngbuba asayar kümogo, koba Carlos Alcaraz-ia majangzüketti lir.

Final asaya ya kanga toktepa asayaogo. Medvedev-i asaya tatem tashi Sinner nongshia asaya-a tiebreaker ana tashi asayatsüsa aküm. Ajisüaka asaya nung tongtibang mapangtem nung Italy nung asayar yagi tajungba asayateta asaya koka liasü.

"Ni tamang mesamai maneni nongshia asaya," ta Sinner-i ashi.

"Ni kü indang shot tem tali asayatsü merang. Ni kanga pelar aser kanga junga tembangtetogo," ta paisa shisem.

Iran FIFA World Cup nung asayatsü: AFC

Metsüremi/March 16, 2026 (Agencies): Asian Football Confederation (AFC)-i sangdong ka ajanga, Iran-i parnok taruba 2026 FIFA World Cup nung masayatsü ta tang tashi nung official osang kecha agüja mali, ta jangjashitsüogo.

Iran national football team ya team 48 asayatsü aliba asayamung atema qualify süatokogo, koba United States, Canada aser Mexico nung June 11 nungi July 19 tashi asayatsü.

Kuala Lumpur nung jembiba mapang AFC general secretary Windsor John-i ashiba agi, taküm World Cup nung Iran maneni shilem agitsü AFC-i imlar.

"Tang ya kanga dang emotional mapang ka lir. Nisung aikati o aika ashir," ta John-i osangbenertem dang ashi.

"Tatem nungbo parnok asayatsü masayatsüji federation-i telemtetba agitsü aser tanü tashi nungbo federation-i ashiba agi parnok World Cup nung asayatsü."

"Parnok ya onok züngsem lir aser onoki parnok asayadaksüner," ta paisa shisem.

United States aser Israel nati Iran amakba den parnokia meyiper Middle East nung tesem balala amak tenzükba sülen tang

mepetmesü tulu adoker aliba mapang ka nung Iran team taküm World Cup nung asayatsü masayatsü mejangjai kümogo.

Iran indang sports minister, Ahmad Donyamali-i ashiba agi, tang tensa mejungi aliba ajanga team iba asayamung nung tokteptsü tamakoktsü küm daksür.

Kasa mapang nung Donald Trump-i Iran team asayamung nung tokteptsü atema pelashishia jaoktsü, saka security dak sendakba nung tensa majung asünung parnok asayatsü ya kangabo tapet masütsü ta shiogo.

Iran national team-i social media ajanga ashiba agi, shingaia parnok iba alima nung football asayamung tulutiba nung asayatsü menokdangtetsü. Parnokisa iba asayamung ya Trump-i masü saka FIFA-ia ayongzükba lir ta ashi.

Iran team group-stage nung asaya asem United States nung asayatsü lir. Parnok New Zealand den Inglewood nung June 16, Belgium den June 21 aser Egypt den Seattle nung June 27 nü asayatsü lir.

Iran team ya World rankings nung jenjang 20buba nung lir aser parnok World Cup pezübuba atema atonga qualify süogo.

Chelsea dang pound million 10 senchi achi

Metsüremi/March 16, 2026 (Agencies): Chelsea dang pound million 10 senchi achiba den asayartem transfer masütsü atema tenokdangba agütsüogo.

2011 aser 2018 küm tsüngda züngoksema maliba agent tem aser third-party tem nem miima pound million 47 agütsüba nangzükba sülen iba senchi aser tenokdangba ya agüja liasü.

Club nemsia ita teku atema academy nunga asayartem transfer masütsü atema tenokdangba ka agütsüogo aser 2019 aser 2022 tsüngda academy asayartem züngoksema atema senchi pound 750,000 chiogo.

Premier League-i sangdong ka ajanga züngoksema maliba agen tem nem senotsü agütsüba indang metetdaksüogo, kong Eden Hazard, Samuel Eto'o, Willian, Ramires, David Luiz, Andre Schurrle aser Nemanja Matic nung jak densema lir.

Club-i iba temerenshi ya agizükogo, koba taoba mapang club kibur Roman Abramovich mapang atalokba lir.

Premier League-i ashiba agi, club den sendaktepa aliba third party temi asayar, züngoksema maliba agent tem aser tanga third party tem nem tajangzük atema senotsü agütsüba ngutetogo.

Todd Boehly-i aniba teloki club ya 2022 küm alizükba sülen

Chelsea puri parnoksa inyakim nung meshidakba metetdakja liasü.

Club-i ashiba agi, "tetenzük nungi club-i iba ken o ya kanga süoki ia agiogo aser ketdangsurtem den teka amteper inyaka aruogo."

Chelsea-i senchi pound million 10.75 agütsütsü aser academy asayartem ita teku tashi transfer mesütetsü, kechiyong parnoki youth development temzüng ozüng nung aibelenogo.

Club-i küm ka atema first-team transfer ban agütsüba dena agizükogo, saka iba ya küm ana atema suspend sütsür lir aser iba mapang aibelen nung dang benoka inyakshitsü.

Tongtibangsa Chelsea pur league nung point majemtsütsü ta Premier League-i jangjatsüogo, kechiyong bushisüngdang ajanga senotsü tsütatepa ya kanga junga metetdakjaka parnoki league indang financial sustainability rules nung aibelen mesüla, ta ashi.

Iba tetezü senchi achiba den academy asayartem transfer asütsü memela-aka first-team atema asayartem maneni transfer sütetsü. Chelsea pur tang Premier League nung trokbuba nung lir aser CL nung parnok Round of 16 nung Paris Saint-Germain den Mongolbarnü asayatsü lir.

BILEMDANGANG

"Tashi agi jembiba agi nai olangtepa ka takok mokoktetsü."